

## *een Piepe mu-j niet an Maarten gèven !*

't Meer dan 100 jöör olde **“Gemaal Stroink”** in Vollen-ove ef een duchtige restaurasie ondergaon. **Waterschap Dents Aoveriesselse Delta** ef op 27 mei 2025 ierveur 't stärtskot egöven en is ter now, *een jöör laterder*, klöör met.


Gemaal Stroink is vernuumd naor Diekgraef Albert Francois Stroink (1876-1956) van destieds Waterschap Vollenove.

't Stiet op de diek tussen Vollenove en Blokziel en regelen de waterstand van meerdere polders in Noordwest-Aoveriesslel en stroomgebied van

Vledderveense,- en Wapserveense Ao in Drente. En geluuf 't maer . . . dät is een beoorlijke sloot water.



**Een stukkein geskiedenis van 't gemaal:** In 1918 bint ze begunnen met de bouw. Toen wierren der twee pompen eplaatst en twee rechtopstaonde stoommechines. In 1928 is ter een derde pompe bi-j ekommen. In de jören 50 van de veurige eeuwe bint de stoommechines vervangen veur dieselmotoren, wöörnao men laterder weer is aover-egaaon op elektriske andrieving. 't Unieke an disse installasie is dät de **“katterugpompen”** gebruik maken van de netuurkunde deur vacuüm te creëren en luchtdruk 't wärk te laoten doen en zodoende 't waeter aover de diek **“(h)evelen”**.



't Istorische gemaal ef de status "**Rieksmonument**". Der maggen dus niks an veranderd wörren as der alternaotieven veur anden bint. En dät brengen weer de neudige kosten met . . . disse restaurasie gonk dan ook zo maer 5,5 miljoen kosten.

***Maer ach . . . a-j 't snel zeggen valt 't nog wel mène.***

En dan der bi'j . . . der ebt weer een boel mensen wärk van en 't geld wörren in eigen land besteed.

***Maer a-j gebruik maken van hevelwärling mu-j gien valse lughtrekken!***

De buuzen veur de anzoeking en ofvoer waeren sinds de bouw in 1918 nooit vervangen of restaureerd, maer vertoonden nao 100 jöör now wel lekkages.

De **Rieksdienst veur Cultureel Ärfgoed** bepaolen welke stukken van de buuzen ersteld mossen/mochen wörren.

't Wazzen veur de annemmers wel een technische uitdagink, maer ach . . . zonder bluf is 't lèven ook suf ! . . . En welke techneut ölt döör now niet van ?

't is allemaol weer terechte ekommen en de klus is eklöörd.

***Maer wöör wi-k now (h)en met dit verael ?***

Buten dät Waterskap Drens Aoverijsselse Delta miljoenen investeren umme de wateruusolding te regelen en wil veurkommen dät de bewoners in 't verzörgings-gebied natte voeten kriegen, is ter in Zwolle ook nog een kunstenaer die ook een strärke binding ef met water en de bi'jbe-eurende techniek.

De beste man is ter in eslaagd een deel industrieel goed veur de sloop te beoeden, *deur 't te kopen*, en wil der now een ontmoetingsplekke creëren as be-old van wat ter ooit wazzen en töt een ni'je plekke te maeken wöör instrueel ärfgoed – netuur – edendaegse kunst – cultuur – olde en nije energie weer samenkommen.

***Elektriciteitscentrale (h)Ärculo*** wazzen altied al een bi'jzondere plekke, maer mut now plekke van ontmoeting, verbinding en verbaezing veur Zwolle gaon wörren.





**Wöör e-k 't ier aover ?**

***De Koelwaterhal ! van Ronald A. Westerhuis.***

Der is hievrer ook stichting **"Koelwaterhal"** op-e-richt.

En geleuf 't now maer . . . 't giet em lukken ! De ontwikkelingen bint goed gangs en de leste jören kump ter steeds meer röring.

Ik magge der graeg kieken en blieve mi'j verbazen aover de maniere wöörop en de meugelijkeden wöörin oplossingen wören evunnen en of bedach.

De veurmalige **Pomphal** is um-e-bouwd töt een indrukwekkende expositie-al, wöörin de gigantische pompmotoren en andere olde technische veurziningen en installasies bint blieven staon, en wöör meerdere sculpturen of andere kunstwärken wörren exposeerd in wisselde samenstelling.



*Expositieruimte Koelwaterhal*





Tiedens de restaurasie van gemaal Stroink mossen der tiedelijk staolen  
 zoegmonden wörren an-e-brach umdät 't gemaal wel mose bliieven wärken.

Umdät toch wel wat zunde zollen wèèn disse dummy-buizen of piepen zomaer te  
 verskrotten, ef Waterskap Drents Aoveriesselse Delta in samenspraak met de  
 annemmers en stichting Koelwaterhal beslöten de beide piepen, *van 10 en 12,5 ton.*  
 per skip naor de veurmalige elektriciteitcentrale "(h)**Ärculo**" te vaeren.




aankomst dummy-buizen - Koelwaterhal Harculo - juli 2026

foto © koelwaterhal



De beide elementen kunnen zo  
be-olen blieven as erinnering  
an wöör ze ooit veur ebben ediend.



Of dissen in de beeldentuun wörren  
opesteld of dät Westerus der wat  
anders van giet maken ?

*... de tied zal 't leren ...*

maer 't is wel dudelijk ewörren ...

***dä-j een piepe bèter an Ronald kunnen gèven dan an Maarten !***

*juli 2026*

